



URED ZA REVIZIJU INSTITUCIJA BiH
КАНЦЕЛАРИЈА ЗА РЕВИЗИЈУ ИНСТИТУЦИЈА БИХ
AUDIT OFFICE OF THE INSTITUTIONS OF BOSNIA AND HERZEGOVINA

www.revizija.gov.ba



2023

**IZVJEŠTAJ O AKTIVNOSTIMA
UREDA ZA REVIZIJU INSTITUCIJA BOSNE I HERCEGOVINE
ZA 2023. GODINU**

Sarajevo, mart 2024. godine

Grafike korištene u izvještaju preuzete su sa web-stranice [Flaticon.com](https://www.flaticon.com)

SADRŽAJ

Riječ generalnog revizora	5
O Uredu	6
Misija, uloga i mandat Ureda	6
Nezavisnost.....	6
Mandat.....	7
Okvir revizije	7
Organizacija i upravljanje	8
Profesionalni razvoj osoblja	8
Etika i integritet	9
Upravljanje rizicima i kvalitetom	9
Finansiranje	10
Izvještavanje	11
Finansijska revizija	13
Finansijska revizija institucija BiH	13
Finansijska revizija izvještaja o izvršenju budžeta institucija BiH	14
Metodologija i kontrola kvaliteta finansijske revizije	14
Revizija učinka.....	15
Metodologija i kontrola kvaliteta revizije učinka	16
IT revizija	16
Godišnji revizorski izvještaj o glavnim nalazima i preporukama	17
Doprinos realizaciji Ciljeva održivog razvoja.....	18
Međunarodna saradnja	19
Komunikacija s Parlamentarnom skupštinom BiH	19
Komunikacija s javnošću i drugim relevantnim akterima	20
Prilozi	22
Prilog 1 – Shematski prikaz organizacije Ureda	23
Prilog 2 – Struktura zaposlenih u Uredu	24
Prilog 3 – Finansijski izvještaj Ureda.....	25

Riječ generalnog revizora

Zadovoljstvo mi je predstaviti vam Godišnji izvještaj o aktivnostima Ureda za reviziju institucija Bosne i Hercegovine za 2023. godinu.

Godišnjim izvještajem o aktivnostima Ured izvještava o provođenju ciljeva i potciljeva utvrđenih Strateškim planom razvoja 2021 – 2025. i godišnjim programom rada Ureda za 2023. godinu.

Revizijom finansijskih izvještaja i usklađenosti poslovanja svih institucija BiH za 2022. godinu, te revizijom izvještaja o izvršenju budžeta institucija BiH za 2022. godinu okončali smo još jedan ciklus finansijske revizije koji je rezultovao velikim brojem značajnih revizionih nalaza i preporuka.

Prošlogodišnjim programom revizije učinka nastojali smo doprinijeti unapređenju oblasti rodne ravnopravnosti u institucijama BiH i pitanja kao što su upravljanje vozilima, softverskim rješenjima i povjerenim javnim poslovima u nadležnosti institucija BiH. Kroz proces praćenja realizacije preporuka revizije učinka mjerodavnim institucijama i javnosti prezentovali smo aktivnosti odgovornih institucija BiH na realizaciji preporuka iz oblasti planiranja budžetskih rashoda, elektronskog poslovanja i upravljanja realizacijom ugovora o javnim nabavkama.

Pored revizionih, realizovan je i cijeli niz komunikacijskih aktivnosti s različitim eksternim akterima, kao što su organizacije civilnog društva, antikorupcijske agencije, međunarodne organizacije, kao i šira javnost, a koje za cilj imaju povećanje razumijevanja uloge i rezultata rada Ureda.

I protekle su se godine brojni materijali Ureda našli na dnevnim redovima sjednica domova i mjerodavnih parlamentarnih komisija Parlamentarne skupštine BiH na kojima je Ured osigurao prisutnost relevantnih sagovornika s ciljem davanja adekvatnih odgovora i pojašnjenja na pitanja poslanika i delegata.

Objektivnim informisanjem javnosti i mjerodavnih institucija o izvršenjima budžeta institucija BiH, načinima korištenja javnih resursa i adresiranjem društveno značajnih pitanja putem provedenih revizija učinka doprinosimo transparentnosti i odgovornosti u upravljanju javnim sredstvima i nadamo se da će preporuke upućene mjerodavnim institucijama rezultovati pozitivnim promjenama i potvrditi ulogu Ureda kao društveno relevantne institucije.

Hrvoje Tvrtković, generalni revizor, v.r.

Datum: 29.3.2024.

Broj: 01-1-02-3-464/24

O Uredu

Misija, uloga i mandat Ureda

Ured za reviziju institucija Bosne i Hercegovine (u daljem tekstu: Ured) je vrhovna revizijska institucija (u daljem tekstu: VRI) osnovana Zakonom o reviziji institucija Bosne i Hercegovine¹ (u daljem tekstu: Zakon o reviziji), kao vanjski, nezavisni revizor koji revidira poslovanje institucija Bosne i Hercegovine. Ured je počeo s radom 2000. godine. Sjedište Ureda je u Sarajevu. Uredom rukovodi generalni revizor koji ima dvoje zamjenika.

Naša misija

Ured za reviziju institucija Bosne i Hercegovine kao nezavisna vrhovna revizijska institucija je profesionalno i nepolitično tijelo koje svoje zadaće obavlja na osnovu Zakona o reviziji institucija BiH i INTOSAI okvira profesionalnih objava s ciljem da doprinese unapređenju ekonomičnosti, efektivnosti i efikasnosti u raspolaganju javnim sredstvima te transparentnosti i odgovornosti u upravljanju u javnom sektoru.



Glavni cilj Ureda je da, provođenjem revizija, osigura nezavisna mišljenja o izvršenju budžeta i finansijskim izvještajima, korištenju resursa i upravljanju državnom svojinom od Vijeća ministara, budžetskih i javnih institucija u BiH, čime se doprinosi pouzdanom izvještavanju o korištenju budžetskih sredstava, transparentnom i kvalitetnom upravljanju javnim prihodima, troškovima i državnom svojinom.

Ured informiše odgovorne institucije i javnost o svojim nalazima i preporukama pravovremenim i javnim objavljivanjem izvještaja o reviziji te, ako su relevantni, drugim oblicima informisanja.

Nezavisnost

Prema Zakonu o reviziji, Ured je, u obavljanju svojih dužnosti i provođenju nadležnosti, nezavisan i ne podliježe upravljanju ili kontroli bilo koje druge osobe ili institucije. Nadalje, Ured je nepolitičan i ne smije podržavati ili biti u vezi s bilo kojom političkom strankom.

Osnovni principi nezavisnosti vrhovnih institucija za reviziju definisani su profesionalnim objavama Međunarodne organizacije vrhovnih institucija za reviziju (INTOSAI) i to Limskom deklaracijom (INTOSAI-P 1) i Meksičkom deklaracijom o nezavisnosti vrhovnih institucija za reviziju (INTOSAI-P 10). Opća skupština Ujedinjenih nacija, u dva je navrata (rezolucijama A/66/209 (2011) i A/69/228 (2014)) potvrdila važnost primjene principa nezavisnosti javne revizije.

Premda je nezavisnost Ureda osigurana Zakonom o reviziji, ona još uvijek nije ustavno utemeljena, kao što je to propisano navedenim deklaracijama.

¹ Službeni glasnik BiH broj 12/06.

Mandat

U okviru svog zakonskog mandata, Ured obavlja dvije osnovne vrste revizije:

Finansijska revizija



- Ured, prema usvojenim revizionim standardima, pregleda finansijske izvještaje i pripadajuće račune institucija kod kojih se obavlja revizija, s ciljem procjene jesu li finansijski izvještaji pouzdani i odražavaju li bilansi u cijelosti rezultate izvršenja budžeta.
- Ured procjenjuje primjenjuju li rukovodioci institucija BiH zakone i propise, koriste li sredstva za odgovarajuće namjene, ocjenjuje finansijsko upravljanje, funkcije interne revizije i sistem internih kontrola.
- Finansijska revizija obuhvata i IT reviziju koja podrazumijeva podršku finansijskoj reviziji u dijelu procesa koji uključuju primjenu informacionih tehnologija (npr. javnih nabavki, rashoda, prihoda i sl.).
- Ured trenutno obavlja redovnu godišnju finansijsku i reviziju usklađenosti kod 74 institucije BiH.

Revizija učinka



- Ured ima pravo izvršiti pregled ili ispitivanje (reviziju učinka) određenog aspekta poslovanja cijele ili dijela institucije, programa ili aktivnosti, u pogledu ekonomičnosti, efikasnosti i efektivnosti kojim ta institucija koristi svoje resurse.
- Postojeći kapaciteti Uredu na godišnjem nivou omogućavaju obavljanje četiri izvještaja revizije učinka i dva izvještaja o realizaciji preporuka revizije učinka.

Okvir revizije

Nadležnost Ureda obuhvata sve javne institucije BiH, uključujući Parlamentarnu skupštinu BiH, Predsjedništvo BiH, Vijeće ministara i budžetske institucije, izvanbudžetska sredstva koja mogu biti predviđena Zakonom o reviziji; sredstva koja su kao zajam ili grant za BiH međunarodna tijela i organizacije osigurali nekoj instituciji ili projektu u BiH, sredstva osigurana iz budžeta bilo kojoj drugoj instituciji, organizaciji ili tijelu, kompaniju u kojoj država ima vlasnički udio od 50% plus jednu dionicu ili više. Revizija uključuje i sve finansijske, administrativne i druge aktivnosti, programe i projekte kojima upravlja jedna ili više institucija i tijela BiH, uključujući procesuiranje i prihode od prodaje imovine, privatizacija i koncesija.

Ured nije mjerodavan za preduzimanje bilo kakve aktivnosti, izvan onih koje se zahtijevaju Zakonom o reviziji, ako smatra da te aktivnosti nisu u skladu s njegovim dužnostima, ili ako bi njihovo obavljanje spriječilo ispunjenje obaveza Ureda po Zakonu o reviziji.

Organizacija i upravljanje



Prema Zakonu o reviziji, na čelu Ureda je generalni revizor koji upravlja Uredom i koji ima dvoje zamjenika.

Hrvoje Tvrtković, generalni revizor Ureda, je na ovu poziciju imenovan u oktobru 2020. godine. Neda Močević, zamjenica generalnog revizora, i Nedžad Hajtić, zamjenik generalnog revizora, imenovani su u junu 2023. godine.

Zaključno s 31. 12. 2023. godine, Ured je zapošljavao ukupno 67 zaposlenika. Shematski prikaz organizacije Ureda prikazan je u prilogu 1. ovog Izveštaja.

Obrazovna, spolna i starosna struktura zaposlenih u Uredu predstavljena je u prilogu 2. Izveštaja.

Plaće zaposlenika Ureda utvrđene su Zakonom o plaćama i naknadama u institucijama Bosne i Hercegovine², podzakonskim aktima i internim pravilima dopuštenim navedenim Zakonom.

Ured rad, između ostalog, organizuje i putem sjednica Stručnog kolegija kao savjetodavnog tijela koje raspravlja i daje mišljenje generalnom revizoru o bitnim pitanjima iz nadležnosti Ureda. Tokom 2023. godine održano je devet sjednica Stručnog kolegija. Rad po specifičnim pitanjima Ured je protekle godine organizovao i formiranjem radnih grupa osoblja Ureda.

Profesionalni razvoj osoblja

Osoblju Ureda, kao najvećem potencijalu Ureda, i u predmetnom izvještajnom periodu posvećena je izuzetna pažnja kroz kontinuirano unapređenje kvalifikacija, znanja i vještina što je Uredu omogućilo unapređivanja, rotaciju i raspoređivanje osoblja na odgovarajućim radnim mjestima.

Izuzetni naponi uloženi su u razvoj i edukovanje zaposlenika.

Naime, u skladu s Pravilnikom o obukama, Ured je u 2023. godini nastavio s kontinuiranim obučavanjem zaposlenika putem internih i eksternih obuka. Interne obuke su provedene na teme od značaja za sam reviziono proces i u vezi s aktuelnom problematikom iz prethodnih procesa revizije. U okviru eksternih obuka, predstavnici Ureda su učestvovali u radionicama iz oblasti javnih nabavki, prevencije korupcije, finansijskog upravljanja i kontrole i prezentacijskih vještina na engleskom jeziku.

U okviru plana rada Koordinacionog odbora vrhovnih institucija za reviziju, osoblje Ureda je, zajedno s osobljem ostalih institucija za reviziju u BiH, pohađalo obuku iz oblasti revizije učinka, kao i obuku koja je za cilj imala unapređenje vještina vođenja revizorskih timova.

Kroz eksterne edukacije za članove revizione i srodnih profesija vršena je profesionalna edukacija revizorskog osoblja iz oblasti računovodstva i revizije.

Kroz aktivnosti međunarodne saradnje i saradnju s međunarodnim institucijama osigurana je razmjena iskustava u oblasti revizije s ciljem unapređenja metodologije rada i alata koji se koriste u revizionom procesu.

² Službeni glasnik BiH br. 50/08, 35/09, 75/09, 32/12, 42/12, 50/12, 32/13, 87/13, 75/15, 88/15, 16/16, 94/16, 72/17, 25/18, 32/20 i 65/20 i 59/22.

Osoblje Ureda je nastavilo s aktivnostima edukacije u okviru program obuke u organizaciji INTOSAI-IDI pod nazivom PESA (Professional Education for SAI Auditors) u kojem trenutno učestvuje sedam revizora Ureda, u programima koji se odnose na finansijsku, reviziju usklađenosti i reviziju učinka.

Etika i integritet



Ured je svojim Etičkim kodeksom razvio vlastiti skup etičkih vrijednosti i principa koji se odnose na Ured kao organizaciju, kao i na njegovo osoblje, bilo da se radi o individualnom ili djelovanju na nivou tima pojedinaca.

U skladu s Etičkim kodeksom i profesionalnim standardima, Ured je u 2023. godini izvršio djelimičnu rotaciju revizorskog osoblja s ciljem umanjavanja rizika od zbližavanja s organizacijom koja se revidira, kao i rizika ugrožavanja profesionalnog skepticizma revizora uslijed dugogodišnjeg angažmana kod istog subjekta.

Kao dodatni način za osiguranje etičkih vrijednosti, protekle je godine realizovana redovna praksa traženja povratnih informacija od subjekata revizije koje svjedoče o visokom stepenu profesionalnosti revizorskog osoblja.

Uz podršku Državnog ureda za reviziju Republike Hrvatske cjelokupno revizorsko osoblje Ureda je 2023. godine učestvovalo na seminaru o etičkim pitanjima koji je obuhvatio upoznavanje s alatima za praćenje i ocjenjivanje etičkih pitanja, iskustvima u revidiranju etičkih pitanja u javnom sektoru kao i aktivnostima EUROSAI-jeve Mreže za etiku.

Upravljanje rizicima i kvalitetom

Upravljanje rizicima je ključan aspekt upravljanja i osigurava postizanje ciljeva Ureda. Odgovarajuće upravljanje rizicima u Uredu osigurava blagovremeno provođenje revizije i davanje nezavisnih mišljenja o finansijskim izvještajima institucija BiH, te objektivno izvještavanje o ekonomičnosti, efikasnosti i efektivnosti određenih aspekata poslovanja institucija BiH.

Upravljanje rizicima je ključni korak za unapređenje sistema finansijskog upravljanja i kontrola. Odgovorni rukovodioci organizacionih jedinica Ureda članovi su Radne grupe za finansijsko upravljanje i kontrolu, a za koordinaciju aktivnosti na upravljanju rizicima Ured ima imenovanu osobu zaduženu za koordinaciju. Članovi radne grupe izvršili su tokom 2023. godine ažuriranje opisa procesa za koje su zaduženi te identifikaciju rizika kao prvog koraka u upravljanju rizicima. Na osnovu provedenih aktivnosti identifikacije i procjene rizika, koordinator aktivnosti upravljanja rizicima pripremio je Registar rizika Ureda. Registar rizika sadrži popis poslovnih procesa i ciljeva, identifikovanih rizika, uspostavljenih kontrola te pregled planiranih aktivnosti odgovara na rizike s rokovima i odgovornim osobama. Kontrola rizika se vrši kroz implementaciju mjera za smanjenje vjerovatnosti da se rizici ostvare ili mjera za umanjivanje njihovih posljedica. Značajniji rizici predmet su rasprava na redovnim sjednicama Stručnog kolegija Ureda.

Ured je u 2023. godini pristupio pilot-projektu koji provodi Razvojna inicijativa Međunarodne organizacije vrhovnih institucija za reviziju (INTOSAI-IDI) pod nazivom Sistem za upravljanje kvalitetom revizija (System of Audit Quality Management – SoAQM). Cilj projekta je da se pruži podrška vrhovnim institucijama za reviziju zemalja u razvoju, članicama INTOSAI-ja, u razvijanju sveobuhvatnog sistema upravljanja kvalitetom u skladu s novousvojenim međunarodnim standardom ISSAI 140. U periodu od juna do decembra 2023. godine osoblje Ureda učestvovalo je na nekoliko online seminara i radionica koje su za cilj imale analizu potreba Ureda po pitanju upravljanja kvalitetom, u skladu s čim su aktivnosti nastavljene u 2024. godini.

U 2023. godini nastavljena je realizacija aktivnosti vezanih za projekt uvođenja sistema upravljanja procesima revizije (AMS) čije je finansiranje predviđeno kroz program IPA II za 2020. godinu. Kreiran je projektni zadatak za implementaciju AMS-a te u saradnji s članovima Evropske delegacije proveden proces pretkvalifikacije u kojem je odabrano nekoliko ponuđača koji su zadovoljili sve uslove. Pokrenuta je dalja procedura nabavke AMS-a.

Finansiranje

Zakonom o budžetu institucija Bosne i Hercegovine i međunarodnih obaveza Bosne i Hercegovine za 2023. godinu (Sl. glasnik BiH, broj 22/23) Uredu za reviziju institucija Bosne i Hercegovine odobren je budžet u iznosu od 6.094.000 KM, od čega su tekući izdaci iznosili 5.800.000 KM, a kapitalni izdaci 294.000 KM. Namjenska neutrošena sredstva iz 2022. godine prenijeta su u iznosu od 505 KM, dok su uplate od drugih nivoa vlasti za program posebne namjene ukupno iznosile 35.000 KM. Iz tekuće rezerve nije bilo doznaka, te je ukupni korigovani budžet u 2023. godini iznosio 6.129.505 KM.

U prva tri mjeseca 2023. godine, finansiranje se odvijalo na osnovu Odluke Vijeća ministara Bosne i Hercegovine o privremenom finansiranju institucija Bosne i Hercegovine i međunarodnih obaveza Bosne i Hercegovine za period januar – mart 2023. godine.

Tokom 2023. godine upućen je jedan zahtjev za prestrukturisanje rashoda. Nedostajuća sredstva u ukupnom iznosu od 23.000 KM na budžetskim pozicijama Izdaci za energiju i komunalne usluge i Unajmljivanje imovine i opreme, osigurana su na osnovu ušteta na pozicijama Putni troškovi i Izdaci telefonskih i poštanskih usluga.

U skladu s Uputstvom o popisu imovine i obaveza budžetskih korisnika – institucija BiH, izvršen je popis sredstava, obaveza i potraživanja na 31. 12. 2023. godine. Nakon obavljenog popisa stalnih sredstava izvršen je obračun inventure i utvrđeno da stvarno stanje stalnih sredstava odgovara knjigovodstvenom stanju.

Tekući izdaci u 2023. godini realizovani su u iznosu od 5.237.947 KM, što čini 89,8% korigovanog budžeta.

Vrijednost ugovorenih kapitalnih izdataka u 2023. godini iznosila je 192.220 KM ili 65,4% ukupne vrijednosti odobrenih kapitalnih izdataka.

Nabavka kapitalnih izdataka izvršena je u skladu s odobrenom namjenskom strukturom.

Od ukupne vrijednosti odobrenih kapitalnih izdataka za opremu, u 2023. godini je ugovoreno 94,2%. Kapitalni izdaci koji se odnose na stalna sredstva u obliku prava planirani su za nabavku sistema za upravljanje dokumentima (DMS-a). Nabavka planiranog sistema nije realizovana s obzirom na to da su u toku aktivnosti na implementaciji sistema za praćenje procesa revizije, koje jednim segmentom pokrivaju dio funkcionalnosti sistema za upravljanje dokumentima. Procedura nabavke navedenog sistema za praćenje procesa revizije je u toku i provodi se u okviru IPA 2020.

Izvršenje budžeta za period izvještaja iznosi 5.430.168 KM, što čini 89% u odnosu na ukupan korigovani budžet.

Finansijski izvještaj u tabelarnom prikazu dat je u prilogu 3. Izvještaja.

Izveštavanje

Tokom 2023. godine Ured je javno objavio te mjerodavnim institucijama i javnosti dostavio sljedeće izvještaje:



74 izvještaja o obavljenim finansijskim revizijama institucija BiH za 2022. godinu




Izvještaj o obavljenom finansijskoj reviziji Izvještaja o izvršenju budžeta institucija BiH za 2022. godinu



Godišnji revizorski izvještaj o glavnim nalazima i preporukama za 2022. godinu



Izvještaj o praćenju realizacije preporuka iz izvještaja revizije učinka „Planiranje budžetskih rashoda institucija BiH“ (2016)



Izvještaj o praćenju realizacije preporuka iz izvještaja revizije učinka „Elektronsko poslovanje u institucijama BiH – uspostava i primjena“ (2017)



Izvještaj o praćenju realizacije preporuka iz izvještaja revizije učinka „Upravljanje procesom realizacije ugovora o javnim nabavkama u institucijama BiH“ (2018)



Izveštaj o obavljenoj reviziji učinka „Uvođenje softverskih rješenja“



Izveštaj o obavljenoj reviziji učinka „Aktivnosti institucija BiH na osiguravanju rodne ravnopravnosti“



Izveštaj o obavljenoj reviziji učinka „Upravljanje voznim parkom u institucijama BiH“



Izveštaj o obavljenoj reviziji učinka „Povjereni javni poslovi iz nadležnosti institucija BiH – Studija slučaja: Ministarstvo komunikacija i prometa BiH“



Rezime revizorskih izvještaja za 2022. godinu



Vodič za građane kroz revizije javnog sektora koje provodi Ured

Svi izvještaji Ureda, osim što se dostavljaju korisnicama u skladu sa Zakonom o reviziji, javno su, u svom cjelovitom obliku, dostupni i na web-stranici Ureda www.revizija.gov.ba.

Finansijska revizija



Zakon o reviziji institucija Bosne i Hercegovine propisuje da prilikom obavljanja finansijske revizije, Ured pregleda finansijske izvještaje i pripadajuće račune, s ciljem procjene da li su finansijski izvještaji pouzdani i da li bilansi u potpunosti odražavaju rezultate izvršenja budžeta. Također, Ured procjenjuje da li rukovodioci institucija BiH primjenjuju zakone i propise, koriste sredstva za odgovarajuće namjene, ocjenjuje finansijsko upravljanje, funkciju interne revizije i sisteme interne kontrole.

Poslovi finansijske revizije u Uredu obavljaju se unutar četiri odjela: tri odjela finansijske revizije i Odjela za razvoj, metodologiju i kontrolu kvaliteta finansijske revizije.

Finansijska revizija institucija BiH

Finansijska revizija institucija BiH se provodi u skladu s godišnjim planom revizije koji donosi generalni revizor. U skladu s godišnjim planom za 2023. godinu, obavljena je završna revizija za 2022. godinu i prethodna revizija za 2023. godinu.

Završna revizija za 2022. godinu obavljena je u periodu od 2. 3. 2023. do 31. 5. 2023. godine i obuhvatila je 74 institucije BiH. Nakon obavljene revizije, rukovodiocima institucija BiH dostavljeni su nacrti izvještaja radi davanja komentara prije pripreme konačnih izvještaja.

Svi izvještaji su, osim izvještaja Obavještajno-sigurnosne agencije BiH, objavljeni na web-stranici Ureda te dostavljeni revidiranim institucijama, Ministarstvu finansija i trezora BiH, Vijeću ministara BiH, Predsjedništvu BiH i Parlamentarnoj skupštini BiH.

U izvještajima o obavljenoj finansijskoj reviziji za 2022. godinu su data mišljenja:

- pozitivno mišljenje za 21 instituciju BiH,
- pozitivno mišljenja sa skretanjem pažnje na finansijske izvještaje i/ili usklađenost poslovanja za 40 institucija BiH,
- mišljenje s rezervom uz skretanje pažnje na finansijske izvještaje i/ili usklađenost poslovanja za 11 institucija BiH i
- suzdržano mišljenje zbog nemogućnosti pribavljanja dovoljnih i primjerenih revizionih dokaza za 2 institucije BiH.

Završnu reviziju za 2022. godinu obavilo je devet timova s 27 revizora, te kombinovani timovi kojim su rukovodili rukovodioci u tri odjela finansijske revizije i u Odjelu za razvoj, metodologiju i kontrolu kvaliteta finansijske revizije (ukupno 31 revizor).

U izvještajima o obavljenoj reviziji za 2022. godinu za 74 institucije BiH date su 473 preporuke. Od ovog broja, 244 preporuke su nove, a 229 preporuka se ponavlja iz ranijeg perioda. Pored toga, kroz pojedinačne izvještaje finansijske revizije za 2022. godinu za 74 institucije BiH provedeno je praćenje realizacije za 610 preporuka datih u ranijim periodima.

Detaljnija analiza datih mišljenja, nalaza te procesa praćenja realizacije preporuka finansijske revizije prezentovana je u Godišnjem izvještaju o glavnim nalazima i preporukama za 2022. godinu koji je sačinjen 2023. godine i dostupan na [web-stranici Ureda](#).

Prethodna revizija za 2023. godinu, koja uključuje i praćenje primjene preporuka iz prethodnih revizija i analiziranje mjera preduzetih na osnovu tih preporuka, provedena je u periodu od 9. 10. do 31. 12. 2023. godine u 61 instituciji BiH³.

Kao sastavni dio revizije Ministarstva vanjskih poslova BiH u oktobru i novembru 2023. godine obavljena je revizija u pet diplomatsko-konzularnih predstavništava BiH (DKP). Revidiranim ambasadama i konzulatima su, putem Ministarstva vanjskih poslova BiH, upućena pisma o nalazima i preporukama za period koji je bio obuhvaćen revizijom. Revizija jednog DKP-a je, iz objektivnih razloga, prolongirana za 2024. godinu.

Prethodnu reviziju za 2023. godinu obavilo je devet stalnih i dva privremena tima u čijem sastavu je 25 revizora te kombinovani timovi kojim su rukovodili rukovodioci odjela finansijske revizije (ukupno 29 revizora).

Finansijska revizija izvještaja o izvršenju budžeta institucija BiH

Godišnji izvještaj o izvršenju budžeta institucija BiH priprema Ministarstvo finansija i trezora BiH u roku od 180 dana od završetka fiskalne godine i podnosi ga Parlamentarnoj skupštini Bosne i Hercegovine, nakon njegovog upućivanja Vijeću ministara BiH i Predsjedništvu Bosne i Hercegovine.

Vijeće ministara BiH je, 7. 6. 2023. godine, usvojilo Izvještaj o izvršenju Budžeta institucija BiH za 2022. godinu. Ured je, u periodu od jula do septembra 2023. godine, obavio reviziju ovog izvještaja. Konačni izvještaj o obavljenoj reviziji je sačinjen u septembru 2023. godine i u zakonskom roku dostavljen mjerodavnim institucijama i parlamentarnim komisijama te je objavljen na web-stranici Ureda.

U Izvještaju za 2022. godinu Ured je iskazao mišljenje s rezervom uz skretanje pažnje kako na finansijski izvještaj tako i na usklađenost aktivnosti, finansijskih transakcija i informacija sa zakonima i propisima.

Izvještaj sadrži 28 preporuka upućenih Vijeću ministara BiH i Ministarstvu finansija i trezora BiH. Od toga, 22 preporuke se odnose na nepravilnosti, nedostatke i slabosti identifikovane u prethodnim izvještajima, koje nisu otklonjene u 2022. godini. Revizijom je obuhvaćena i implementacija 60 preporuka datih u ranijim periodima.

Detaljnije informacije o nalazima i preporukama iz ovog izvještaja dostupne su na [web-stranici Ureda](#).

Metodologija i kontrola kvaliteta finansijske revizije

Skup profesionalnih principa, standarda i smjernica za revizore javnog sektora zvanično usvaja i objavljuje Međunarodna organizacija vrhovnih revizionih institucija (INTOSAI). Ured, prema Zakonu o reviziji, mora primjenjivati INTOSAI revizione standarde i osigurati njihovu primjenu prilikom obavljanja revizije.

Okvir međunarodnih standarda vrhovnih revizionih institucija – ISSAI okvir je, odlukom Kongresa Međunarodne organizacije vrhovnih revizionih institucija (INCOSAI), prerastao u Okvir profesionalnih objava Međunarodne organizacije vrhovnih revizionih institucija - IFPP okvir, pri čemu je izmijenjena njegova struktura i numeracija. Generalni revizor Ureda je u januaru 2023.

³ Obavljanje prethodne revizije u preostalim 13 institucija planirano je u januaru 2024. godine

godine donio Odluku o objavi Okvira profesionalnih objava Međunarodne organizacije vrhovnih revizionih institucija - IFPP okvira koji ima tri nivoa: INTOSAI principe, ISSAI standarde i INTOSAI smjernice.

Uz bilateralnu podršku OECD SIGMA-e u septembru 2023. godine započeo je projekt revidiranja i ažuriranja metodologije finansijske revizije, odnosno izrade proceduralnih/provedbenih smjernica i alata koji podržavaju efikasno provođenje revizije u skladu s IFPP okvirom. U tom je smislu u 2023. godini provedena anketa među zaposlenima u Uredu koji su uključeni u godišnje finansijske revizije kako bi se dobilo mišljenje o kvalitetu i primjenjivosti Vodiča u smislu pružanja smjernica u provođenju godišnjih finansijskih revizija. Izvršen je pregled i analiza (gap analiza) trenutne metodologije finansijske revizije u odnosu na zahtjeve IFPP okvira, nakon čega su održane fokus grupe s osobljem Ureda kako bi se prodiskutovali rezultati gap analize koja je dostavljena. Krajem 2023. godine održan je sastanak članova SIGMA tima s članovima tima Ureda na kojem su određene teme (oblasti revizije) koje trebaju biti obrađene na stručnoj radionici i određen je vremenski okvir za izradu početnih dokumenata.

Što se tiče aktivnosti iz oblasti kontrole kvaliteta finansijske revizije, Odjel za razvoj, metodologiju i kontrolu kvaliteta finansijske revizije je u 2023. godini ažurirao metodologiju koja se primjenjuje u finansijskoj reviziji (programi, testovi, ček-liste itd.) Jedan od elemenata upravljanja kvalitetom finansijske revizije je ocjenjivanje značajnih prosudbi revizionog tima i zaključaka donesenih na osnovu njih, koje obavlja kontrola kvaliteta na datum ili prije datuma izvještaja o reviziji. U ovom su smislu svi nacrti izvještaja finansijske revizije za 2022. godinu bili predmetom kontrole kvaliteta.

Kao dodatni mehanizam za unapređenje kvaliteta rada finansijske revizije, i protekle je godine realizovana praksa traženja povratnih informacija od svih subjekata finansijske revizije, gdje se subjekti revizije mogu izjasniti o određenim elementima samog procesa revizije, a što Uredu pruža mogućnost unapređenja praksi revizije, procesa revizije, kao osiguravanje dvosmjerne komunikacije sa subjektima revizije koja doprinosi transparentnosti i objektivnosti revizionih postupaka.

Revizija učinka



Prema Zakonu o reviziji institucija Bosne i Hercegovine, Ured ima pravo obaviti pregled ili ispitivanje (reviziju učinka) određenoga aspekta poslovanja cijele ili dijela institucije, programa ili aktivnosti, u pogledu ekonomičnosti, učinkovitosti i efektivnosti s kojim ta institucija koristi svoje resurse i o tome izvijestiti mjerodavne institucije i javnost. Revizija učinka u 2023. godini izvršena je u skladu s planom revizija učinka koji donosi generalni revizor.

Poslovi revizije učinka u Uredu obavljaju se unutar dva odjela: Odjela revizije učinka i Odjela za kontrolu kvaliteta, metodologiju i planiranje revizije učinka.

U 2023. godini Ured je proveo četiri revizije učinka na teme kako slijedi:

- Uvođenje softverskih rješenja u institucijama BiH,
- Aktivnosti institucija BiH na osiguravanju rodne ravnopravnosti,
- Upravljanje voznim parkom u institucijama BiH,
- Povjereni javni poslovi iz nadležnosti institucija BiH – studija slučaja: Ministarstvo komunikacija i prometa BiH.

Navedene revizije provela su četiri revizorska tima.

Pored četiri obavljene revizije učinka, peti revizorski tim tokom 2023. godine izradio je tri izvještaja o praćenju realizacije preporuka revizija učinka provedenih u ranijim godinama i to:

- „Planiranje budžetskih rashoda u institucijama BiH“ iz 2016. godine,
- „Elektronsko poslovanje u institucijama BiH - uspostava i primjena“ iz 2017. godine, i
- „Upravljanje procesom realizacije ugovora o javnim nabavkama u institucijama BiH“ iz 2018. godine.

U 2023. godini praćene su preduzete aktivnosti na implementaciji 31 preporuke iz navedenih izvještaja revizije učinka.

Detaljnije informacije o nalazima provedenih revizija učinka i analizi izvršenih praćenja realizacije preporuka mogu se pronaći u zasebnim izvještajima dostupnim na web-stranici Ureda www.revizija.gov.ba.

Metodologija i kontrola kvaliteta revizije učinka

Osnovu metodologije rada revizije učinka čine: ISSAI standardi revizije učinka, Vodič za reviziju učinka i Vodič za osiguranje kvaliteta u reviziji učinka.

S ciljem jačanja procesa planiranja revizije učinka, Ured je u 2023. godini razvio dokument pod nazivom „Strateško opredjeljenje Ureda za reviziju institucija BiH u odabiru tema revizije učinka“ koji predstavlja temeljni input za odabir tema koje će obrađivati revizija učinka u narednom periodu. Pored navedenog, u toku 2023. godine Ured je razvio i Smjernicu za pripremu obrazloženja tema revizije učinka, Smjernicu za pripremu plana rada revizije učinka i Smjernicu za odlaganja dokumentacije revizije učinka, čime je unaprijedio postojeću metodologiju i prakse rada.

Prema ISSAI standardima, pitanje kvaliteta revizije učinka mora biti integrisano u cjelokupan proces revizije, od strateškog planiranja pa sve do praćenja realizacije preporuka izvještaja o reviziji. Ured je, tokom posljednjih godina, usmjerio aktivnosti na jačanje funkcije kontrole kvaliteta revizije učinka. Tokom 2023. godine obavljena je kontrola kvaliteta za četiri izvještaja revizije učinka. Provedene aktivnosti, osim analize i davanja komentara na nacрте izvještaja, prije njihovog dostavljanja revidiranim institucijama, podrazumijevale su i aktivnosti kontrole kvaliteta vezane za ukupan proces provedenih revizija, posebno u fazi pripreme planova rada nakon provedenih predstudijskih istraživanja.

Kontrola kvaliteta revizije učinka je proces koji je potrebno kontinuirano nadograđivati kako bi se zadržao visok nivo kvaliteta objavljenih izvještaja revizije učinka. Preduzimanjem aktivnosti i jačanjem procesa kontrole kvaliteta revizije učinka, Ured osigurava da nalazi i poruke koje daje kroz izvještaje revizije učinka budu aktuelni, usmjereni ka rješavanju problema u funkcionisanju institucija BiH i unapređenju kvaliteta života građana BiH.

Kao i za finansijsku reviziju, protekle je godine realizovana praksa traženja povratnih informacija od subjekata revizije učinka kao dodatni mehanizam za unapređenje kvaliteta rada revizije učinka. Ova praksa Uredu pruža mogućnost unapređenja prakse revizije učinka, samog procesa revizije, kao osiguravanje dvosmjerne komunikacije sa subjektima revizije koja doprinosi transparentnosti i objektivnosti revizionih postupaka.

IT revizija

Finansijska revizija, pored revizije finansijskih izvještaja i revizije usklađenosti, obuhvata i reviziju informacionih sistema u institucijama BiH. Revizija informacionih sistema podrazumijeva podršku

finansijskoj reviziji u dijelu procesa koji uključuje primjenu informacionih tehnologija (npr. javnih nabavki, rashoda, prihoda i sl.).

S aspekta IT revizije i podrške IT revizora procesu završne finansijske revizije, revidirano je 25 institucija. Pored navedenog, IT revizori su u procesu prethodne finansijske revizije za 2023. godinu revidirali 20 institucija. IT revizori su učestvovali i u reviziji i izradi Godišnjeg revizorskog izvještaja o glavnim nalazima i preporukama za 2022. godinu i Godišnjeg izvještaja revizije o izvršenju budžeta za 2022. godinu.

Osim finansijske revizije, IT revizori su direktno ili indirektno uključeni i u procese provođenja revizija učinka. Tako je Odsjek za IT poslove u 2023. godini pružao podršku u analizi i izboru tema revizije učinka, te aktivno učestvovao u studiji Uvođenje softverskih rješenja.

Godišnji revizorski izvještaj o glavnim nalazima i preporukama

Prema Zakonu o reviziji institucija Bosne i Hercegovine, Ured je dužan prikupiti najvažnije nalaze i preporuke iz obavljenih finansijskih revizija, revizija učinka i specijalnih revizija u godišnjem revizorskom izvještaju Parlamentu.

Godišnji revizorski izvještaj o glavnim nalazima i preporukama za 2022. godinu izrađen je i Parlamentarnoj skupštini BiH dostavljen u septembru 2023. godine. Izvještaj sadrži glavne nalaze i preporuke iz finansijskih revizija institucija BiH za 2022. godinu, finansijske revizije Izvještaja o izvršenju budžeta institucija BiH za 2022. godinu, kao i iz revizija učinka provedenih tokom 2022. godine.

Ovim izvještajem Ured je obuhvatio 20 sistemskih pitanja i problema identifikovanih tokom procesa finansijske revizije koji su posljedica nedostatka odgovornosti rukovodstva institucija, nepostojanja sistemskih rješenja, nedostajućih zakonskih i podzakonskih akata i usvojenih standarda ponašanja i potrošnje i dodatna ograničenja zbog nepravovremenog usvajanja budžeta institucija BiH za 2022. godinu. Pored pitanja uočenih kroz proces finansijske revizije, Parlamentarna skupština BiH je kroz ovaj izvještaj dodatno upoznata i s nalazima četiri oblasti koje su bile predmetom revizija učinka provedenih u 2022. godini.

Cjeloviti Godišnji izvještaj o glavnim nalazima i preporukama za 2022. godinu, koji je sačinjen 2023. godine, dostupan je na [web-stranici Ureda](#).

Doprinos realizaciji Ciljeva održivog razvoja



Vrhovne institucije za reviziju u jedinstvenoj su poziciji da svojim aktivnostima i izvještavanjem o provedenim finansijskim i revizijama učinka revizija daju direktan doprinos implementaciji Agende Ujedinjenih nacija 2030 i Ciljeva održivog razvoja, posebno Cilja 16 – Promovisati miroljubiva i inkluzivna društva za održivi razvoj, osigurati pristup pravdi za sve i izgraditi učinkovite, odgovorne i inkluzivne institucije na svim nivoima.

U 2023. godini okončan je projekt regionalne paralelne revizije učinka iz oblasti Cilja održivog razvoja 5 - Postići rodnu ravnopravnost i osnaživati sve žene i djevojčice. U okviru projekta i uz podršku Agencije Ujedinjenih naroda za rodnu ravnopravnost i osnaživanje žena (UN WOMEN), pet vrhovnih institucija za reviziju iz BiH, Srbije i Crne Gore provele su revizije učinka i mjerodavnim institucijama uputile preporuke koje za cilj imaju unaprijediti oblast rodne ravnopravnosti u svojim zemljama.



Pored navedenog, u martu 2023. godine, UN WOMEN i Ured zajednički su realizovali online događaj pod nazivom „Ublažavanje finansijskog rodno zasnovanog jaza s ciljem ubrzane realizacije Ciljeva održivog razvoja“ koji je upriličen na marginama Regionalnog foruma o održivom razvoju 2023 s ciljem razmjene iskustava i praksi u međusektorskim pristupima finansiranju koji doprinose rodnoj ravnopravnosti.



U periodu juni – decembar 2023. godine, kao dio projekta Upravljanje javnim finansijama (Public Finance Management – PFM) koji implementira Razvojni program Ujedinjenih nacija u BiH (UNDP BiH) uz podršku Vlade Slovačke Republike, osoblje revizije učinka Ureda i ostalih institucija za reviziju iz BiH učestvovalo je u kratkoročnom programu podrške vrhovnim institucijama za reviziju u BiH za provođenje aktivnosti iz svoje nadležnosti koje se odnose na implementaciju Okvira za Ciljeve održivog razvoja u BiH. Cilj učešća u ovom projektu bio je jačanje kapaciteta za planiranje budućih revizija koje doprinose implementaciji ovog Okvira u BiH.

Međunarodna saradnja

Međunarodnu saradnju Ured uglavnom ostvaruje putem članstava u Međunarodnoj organizaciji vrhovnih institucija za reviziju (INTOSAI), Evropskoj organizaciji vrhovnih institucija za reviziju (EUROSAI) i Mreži vrhovnih institucija za reviziju zemalja kandidata i potencijalnih kandidata i Evropskog revizorskog suda (Mreža).




U 2023. godini Ured je aktivno doprinio realizaciji redovnih godišnjih aktivnosti EUROSAI radne grupe za IT reviziju (kao i EUROSAI radne podgrupe za e-Government), EUROSAI radne grupe za reviziju okoliša, EUROSAI projektnog tima za reviziju u stvarnom vremenu, kao i INTOSAI radne grupe za saradnju s građanima i civilnim društvom.

Proteklu su godinu obilježile i brojne aktivnosti Ureda kao predsjedavajućeg Mreže, uključujući predsjedavanje online sastankom rukovodilaca vrhovnih institucija za reviziju Mreže na kojem je usvojen Okvir za saradnju unutar Mreže i predsjedavanje sastankom službenika za vezu Mreže održanom u Lisabonu u junu 2023. godine. U okviru plana rada Mreže, također u junu, Ured je bio domaćin okruglog stola na temu saradnje vrhovnih institucija za reviziju s relevantnim eksternim akterima s fokusom na organizacije civilnog društva.

Razmjena iskustava na regionalnom nivou je, u 2023. godini, realizovana kroz bilateralne radne posjete Uredu delegacija iz vrhovnih institucija za reviziju Crne Gore, Hrvatske i Sjeverne Makedonije.

Komunikacija s Parlamentarnom skupštinom BiH

Saradnja parlamenata i vrhovnih institucija za reviziju predstavlja najvažniji mehanizam nadzora nad upotrebom javnih sredstava od institucija izvršne vlasti. Vrhovne institucije za reviziju, u skladu sa zakonom i standardima struke, prikupljaju profesionalne i objektivne informacije koje parlamenti koriste kako bi se uvjerali u pouzdanost finansijskog izvještavanja i način upotrebe javnih resursa. U tom smislu, veliku ulogu u unapređenju transparentnosti i javne odgovornosti imaju mjerodavne parlamentarne komisije koje, kroz svoje djelovanje, podupiru aktivnosti vrhovnih revizionih institucija i, kroz insistiranje na realizaciji preporuka i praćenje njihove realizacije, pomažu razvoju sistema odgovornosti u javnom sektoru.



Ured je tokom 2023. godine Parlamentarnoj skupštini BiH dostavio 74 izvještaja o provedenim finansijskim revizijama institucija BiH za 2022. godinu, Izvještaj o obavljenoj finansijskoj reviziji Izvještaja o izvršenju budžeta institucija BiH za 2022. godinu, Godišnji revizorski izvještaj o glavnim nalazima i preporukama za 2022. godinu, tri izvještaja o provedenim revizijama učinka, te tri izvještaja o provedenim praćenjima realizacije preporuka iz izvještaja o provedenim revizijama učinka. Svi izvještaji su razmatrani na sjednicama mjerodavnih parlamentarnih komisija, kao i sjednicama Predstavničkog i Doma naroda, te su popraćeni brojnim parlamentarnim zaključcima. Za 11 izvještaja finansijske revizije u kojima je za 2022. godinu izraženo mišljenje s rezervom održana su javna saslušanja predstavnika institucija BiH na koje se ovi izvještaji odnose. Usvojen je i zaključak Doma naroda da se svih 11 izvještaja finansijske revizije institucija BiH čije je finansijsko poslovanje ocijenjeno revizorskim mišljenjem s rezervom sa skretanjem pažnje dostavi glavnom državnom tužiocu BiH radi utvrđivanja eventualne krivične odgovornosti rukovodilaca predmetnih organizacionih jedinica institucija BiH.

Ured osigurava prisustvo svojih predstavnika na sjednicama parlamentarnih komisija za finansije i budžet, te drugih komisija, prema potrebi i mandatu, kao i sjednicama domova koje na dnevnom redu imaju tačke koje se odnose na rad Ureda i, u okviru svog mandata, aktivno učestvuju u njihovom radu.

Delegacija Komisije za finansije i budžet Predstavničkog doma u 2023. godini je posjetila Ured s ciljem razmjene informacija kako bi aktivnosti Ureda, i aktivnosti koje Komisija provodi na osnovu dostavljenih izvještaja o provedenim revizijama, rezultovali što većom odgovornošću u upravljanju javnim novcem na nivou institucija BiH.

Komunikacija s javnošću i drugim relevantnim akterima



Komunikacijske aktivnosti prema eksternim akterima nastavile su se intenzivno provoditi tokom 2023. godine u skladu s Komunikacijskom strategijom i komunikacijskim planovima izrađenim za svakog pojedinačnog eksternog relevantnog aktera. Svrha komunikacijskih aktivnosti je povećati učinak rada Ureda i smanjiti rizik od pogrešne komunikacije čime se osigurava da se željene informacije izražavaju u obliku koji je najjasnije razumljiv i upotrebljiv za ciljanu publiku.

Tako je 2023. godine Ured izradio i objavio prvi Vodič za građane čiji cilj je građankama i građanima približiti rad Ureda i time povećati njihovo razumijevanje procesa revizije javnog sektora koje obavlja Ured i njegove uloge u sistemu javne uprave u Bosni i Hercegovini.

Ured i Agencija za prevenciju korupcije i koordinaciju borbe protiv korupcije BiH su, 2023. godine, u cilju snažnijeg antikorupcijskog djelovanja potpisali Memorandum o razumijevanju i saradnji.

Radi efikasne razmjene informacija i diskusije u kontekstu izmjena i dopuna Zakona o javnim nabavkama, žalbenih postupaka, sudske prakse i praktične primjene Zakona u revizionim procesima, Ured je organizovao okrugli sto s predstavnicima Agencije za javne nabavke BiH, Ureda za razmatranje žalbi BiH i Suda BiH.

S ciljem sticanja većeg stepena razumijevanja osnovnih poruka iz izvještaja o reviziji, Ured je i ove godine nastojao rezultate svoga rada prezentovati širem krugu korisnika kroz prezentaciju infografičkih rješenja koja su dostupna na <https://www.revizija.gov.ba/Content/Read/infografike>. Pored redovnog izvještavanja javnosti o aktivnostima Ureda putem zvanične web-stranice Ureda, službeni Twitter profil Ureda [@UredzaReviziju](#) intenzivno je korišten kao medij putem kojeg smo javnost, kroz preko 50 objava, u stvarnom vremenu upoznavali o aktivnostima Ureda i onim od značaja za rad Ureda.

Saradnja s organizacijama civilnog društva realizovala se kroz niz aktivnosti učešćem predstavnika Ureda u radnim grupama, panel-diskusijama, konsultativnim sastancima, konferencijama. Početkom 2023. godine održan je redovni godišnji sastanak koji ima za cilj upoznavanje predstavnica i predstavnika organizacija civilnog društva s okvirnim temama koje čine godišnji program revizije učinka, kao i identifikovanje i diskusiju o društveno značajnim problemima za koje organizacije civilnog društva smatraju da bi mogli biti predmetom revizije učinka.

Komunikacija u kontekstu evropskih integracija odvija se putem redovnih pisanih doprinosa koje Ured dostavlja u formi priloga institucija u BiH za redovni godišnji izvještaj Evropske komisije o napretku BiH u procesu evropskih integracija i dokumenata za diskusiju za redovne godišnje sastanke Pododbora za ekonomska i finansijska pitanja i statistiku, zajedničkog tijela BiH i EU uspostavljenog s ciljem provođenja Sporazuma o stabilizaciji i pridruživanju.

Saradnja s institucijama za reviziju u BiH odvijala se kroz aktivnosti Koordinacionog odbora vrhovnih institucija za reviziju u BiH. Koordinacioni odbor je u 2023. godini održao sedam sjednica u organizaciji svih vrhovnih revizionih institucija.

U vezi s postupanjem u skladu sa Zakonom o slobodi pristupa informacijama na nivou institucija BiH, u izvještajnom periodu su zaprimljena dva zahtjeva za pristup informacijama. Vrste informacija tražene zahtjevima odnosile su se na informacije o broju i karakteristikama podnesenih zahtjeva za pristup informacijama, te informacije o subjektima koji nisu postupili u skladu s članom 16. Zakona o reviziji institucija BiH. Ured je po oba zaprimljena zahtjeva donio rješenje o odobravanju pristupa informacijama i podnosiocima zahtjeva dostavio tražene informacije.


Prilozi

Prilog 1. – Shematski prikaz organizacije Ureda

Prilog 2. – Obrazovna, spolna i starosna struktura zaposlenih u Uredu

Prilog 3. – Finansijski izvještaj Ureda

Prilog 1 – Shematski prikaz organizacije Ureda



Prilog 2 – Struktura zaposlenih u Uredu


Obrazovna struktura

VSS	59
SSS	8
Ukupno	67⁴




Spolna struktura

Muški spol	26
Ženski spol	41
Ukupno	67



Starosna struktura

20-29 godina	0
30-39 godina	7
40-49 godina	46
50-59 godina	10
60-65 godina	4
Ukupno	67



⁴ 2 zaposlenika – odsustvo s rada bez naknade plaće – neplaćeno odsustvo

Pregled rashoda i izdataka po ekonomskim kategorijama

Period izvještavanja: od 1. 1. do 31. 12. 2023. godine

Red. br.	Opis	Ekon. kod	Budžet	Izmjene i dopune	Korigovani budžet	Ostvareni kumulativni iznos rashoda i izdataka	Ostvareni kumulativni iznos istog period prethodne godine	Procent 7/6x100	Procent 7/8x100
1	2	3	4	5	6 (4+5)	7	8	9	10
1	Ukupni tekući rashodi (2+5)	610000	5.800.000	35.505.	5.835.505	5.237.947	4.364.090	89,8%	120,0%
2	Plaće i naknade troškova zaposlenih (3+4)	611000	4.884.000	0	4.884.000	4.395.531	3.657.733	90,0%	120,2%
3	Bruto plaće i naknade plaća	611100	4.441.000	0	4.441.000	4.021.149	3.378.669	90,5%	119,0%
4	Naknade troškova zaposlenih	611200	443.000	0	443.000	374.382	279.064	84,5%	134,2%
5	Izdaci za materijal, sitan inventar i usluge	613000	916.000	35.505	951.505	842.416	706.358	88,5%	119,3%
6	Putni troškovi	613100	200.000	-16.000	184.000	152.064	111.122	82,6%	136,8%
7	Izdaci telefonskih i poštanskih usluga	613200	45.000	-7.000	38.000	31.643	33.784	83,3%	93,7%
8	Izdaci za energiju i komunalne usluge	613300	86.000	16.000	102.000	101.079	79.778	99,1%	126,7%
9	Nabavka materijala i sitnog inventara	613400	50.000	0	50.000	31.057	23.500	62,1%	132,2%
10	Izdaci za usluge prijevoza i goriva	613500	45.000	0	45.000	24.219	31.506	53,8%	76,9%
11	Unajmljivanje imovine i opreme	613600	311.000	7.000	318.000	317.934	295.393	100%	107,6%
12	Izdaci za tekuće održavanje	613700	45.000	0	45.000	39.308	22.429	97,4%	175,3%
13	Izdaci osiguranja, bankarskih usluga i usluga pl. prometa	613800	14.000	0	14.000	9.447	8.226	67,5%	114,9%
14	Ugovorene i druge posebne usluge	613900	120.000	35.505	155.505	135.664	100.621	87,2%	134,8%
15	Ukupni kapitalni izdaci (16)	820000	294.000	0	294.000	192.220	158.262	65,4%	121,5%
16	Izdaci za nabavku stalnih sredstava	821000	294.000	0	294.000	192.220	158.262	65,4%	121,5%
17	Nabavka opreme	821300	204.000	0	204.000	192.220	158.262	94,2%	121,5%
18	Nabavka stalnih sredstava u obliku prava	821500	90.000	0	90.000	0	0	0%	0%
			6.094.000	35.505	6.129.505	5.430.168	4.522.353	88,6%	120,1%

URED ZA REVIZIJU INSTITUCIJA BOSNE I HERCEGOVINE

Ul. Tešanjaska 24a/29
71 000 Sarajevo
Bosna i Hercegovina

Tel./faks:

++387 (0) 33 275 400, 275 401

E-mail:

saibih@revizija.gov.ba

Web-stranica:

www.revizija.gov.ba